



Gabinete Wever - Croes II

ISLAONLINE


Noticia di Gobierno

2023

Dialuna 26 Juni 2023

Email: IslaOnline@gobierno.aw Tel: 528-4952

2023
AÑA DI



UNION
Y POSITIVISMO!



@IslaOnline2023



PROME MINISTER SORPRENDI CU ACCION DI ABOGADO DI ARUBA BIRDLIFE CONSERVATION

Riba insistencia di prensa Promer Minister Evelyn Wever-Croes a declara cu e mes ta sumamente sorprendi cu su colega minister a cuminsa un caso contra su mesun gobierno y pues su mes. “Mi no ta compronde e strategia di e abogado cu a propone esaki, cu ta algo huridicamente incorrecto. Mi a pidi colega minister Ursell Arends pa un splicacion kiko a bai fout aki, y mi ta pendiente di esaki. E ta un eror grave y esnan responsabel mester carga nan responsabilidad. Pasobra e accion aki por causa daño na e credibilidad di henter nos gobierno, siendo cu demas ministernan no tin arte ni parte den esaki. Nos ta un gobierno serio, mi a lidera nos gobierno durante e peor pandemia cu nos pais a pasa aden, y na forma responsabel y exitoso. Locual a pasa diabierna cu e caso entama pa Aruba Birdlife Conservation, ta atacha e imagen di gobierno y esey mi no ta acepta. Minister Ursell Arends ta trahando pa coregi e eror y e mes lo duna mas splicacion di kiko a bai fout. Pues no ta trata aki di problema entre un minister y e resto di su gobierno; ta simplemente un eror”, segun e promer mandatario di nos pais.



demas departamentonan, y hasta a inclui e recomendacionnan di Directie Natuur en Milieu (DNM) como condicion den e aanlegvergunning.

Segun minister Arends y DNM a resulta despues, cu e hotel lo a viola e vergunning otorga. A base di rapport di DNM ta evaluando si esaki ta e caso of no y ki paso mester tuma al respecto.

Pa loke ta trata e caso mes di Embassy Suites, promer minister a indica cu Embassy Hotel ta un proyecto di varios gobernacionnan, y cu e mes a yega y haya e proyecto cla. Ta un hotel cu ta duna empleo na hopi mama y tata di famia local. Nan a hasi un peticion pa por drecha e beach, y nan a haya promesanan di ministernan anterior. DIP a otorga e ‘aanlegvergunning’ pa nan drecha e beach completamente den cuadro di ley y teniendo na cuenta e consehonan di

Promer Minister ta reitera cu desaroyo economico ta importante pa nos pais por recupera y den esaki mester busca un balance entre desaroyo y naturalesa. Gobierno di Aruba ta aprecia e interes di inversionistanan local y stranhero. Aruba tin un sistema legal hopi solido y pues permiso y condicionnan mester wordo cumpli cune. Den e caso aki no ta diferente. E departamentonan di gobierno ta haciendo nan maximo esfuerzo pa resolve e situacion mas pronto cu ta posibel.

Prome Minister Evelyn Wever-Croes:

PROME MINISTER A DISFRUTA DI UN BUNITA PRESENTACION DI LEERORKEST Y MUCHANAN DI PRINSES AMALIA BASISSSCHOOL

Prome Minister Minister Evelyn Wever-Croes dialuna mainta, a bishita Prinses Amalia Basisschool na unda cu tawata tin un presentacion di Leerorkest. Leerorkest ta un proyecto cu a cuminsa algun aña pasa pa purba trece e conocimiento di musica den alumnonan di scolnan, tanto den conocimiento di canto pero tambe den instrumentonan di musica.

Prome Minister a disfruta di un bunita presentacion duna na mayornan di nos muchanan di Prinses Amalia Basisschool. Prome Minister ta felicita Leerorkest cu e exito di e proyecto aki y pa e presentacionnan tumando luga na diferente scol na Aruba.

“Por a nota cu mayornan ta hopi impresiona y contento pa mira con nan yiunan ta desaroyando riba e area di musica y instrumentonan cu usualmente nos no ta expone nos muchanan na dje. Pabien na Leerorkest y na juffrouw Roelin Hofman y tur e ekipo di Prinses Amalia Basisschool. Esaki ta algo cu ta tuma hopi tempo y hopi pasenshi”, Prome Minister a expresa.

Prome Minister a remarca cu compara cu aña pasa, el a nota un diferencia y progreso hopi grandi siendo cu aña pasa e muchanan a duna un bunita presentacion, e aña aki a bay mas riba un nivel di profesionalismo. “Pabien cu e bunita proyecto. Un proyecto cu tin hopi reto, pero ta trahando riba solucionnan pa asina e proyecto continua”, Prome Minister a enfatisa.



Prome Minister Evelyn Wever-Croes:

A FIRMA PROTOCOL PA INDEPENDISACION DI RAAD VAN ADVIES

**“Independisacion di nos colegionan halto ta necesario pa asina por duna
conseho y veredictonan obhetivo cu lo yuda democracia di nos pais”**



Fortificacion di Estado di Derecho ta hopi importante pa un pais. Y como pais, Aruba tin algun colegio halto di estado cu ta esunnan cu ta garantisa democracio di nos pais. Tur gobernacion mester tin nan colegionan halto di estado ekipa cu tur herment necesario pa haci e trabou cu nan mester haci. Organo Consultativo, Raad van Advies (RvA) ta un di e colegionan halto di estado. Y awo e ta wordo independisa. Raad van Advies ta e organo cu ta duna conseho na Gobierno y Parlamento riba tur ley cu mester pasa den Parlamento. Tanto Gobierno como Parlamento semper mester di conseho of veredicto di un Raad van Advies independiente.

Prome Minister Evelyn Wever-Croes a remarca cu desde el a drenta gobernacion, el a cuminsa cu e proceso di independisa Raad van Advies, Algemene Rekenkamer y di Parlamento. Independisacion di nos colegionan halto ta necesario pa asina nan no depende di Gobierno y por duna conseho y veredictonan obhetivo cu lo yuda democracia di nos pais.

E leynan necesario pa haci Raad van Advies independiente a wordo pasa caba y dialuna mainta un protocol a wordo firma entre Raad van Advies, Directie Financiën, Departamento di Recurso Humano y Gobierno pa independisacion di Raad van Advies y con pa duna contenido na esaki. Raad van Advies por busca e personal cu e tin mester cu ta cualifica y e proceso aki no mester pasa via Gobierno mas. Tambe Raad van Advies mes lo maneja e presupuesto cu e ta haya anualmente den e presupuesto di Gobierno di Aruba cu ta pasa Parlamento.

“Mi ta felicita Raad van Advies cu e paso grandi aki pasobra awo realmente nan por considera nan mes independiente di Gobierno di Aruba. Danki na Directie Financiën y Departamento di Recurso Humano cu a yuda den e proceso aki”, Prome Minister a indica.

Desde cu Prome Minister a drenta den Gobierno, el a institui e comision ‘Commissie Versterking Democratisch Bestel. E comision aki a haci trabounan hopi grandi pa asina awe por



independisa Raad van Advies. Tambe nan a haci e trabou preparatorio caba pa Ombudsman. Esaki tambe ta un proceso y ehecucion independiente di Gobierno di Aruba.

Siguientemente, Prome Minister a remarca, lo sigui traha riba independisacion di Parlamento y di Controlaria General (Algemene Rekenkamer, ARA) pa asina nan no depende riba e maneho di Gobierno den entre otro busca nan personal y e maneho di e fondonan cu nan ta haya anualmente den e presupuesto di Gobierno.

“Esakinan ta pasonan grandi y esfuersonan ta wordo haci pa den e periodo di gobernacion aki ainda, tur Colegio Halto di Estado keda independisa pa garantisa democracia. Ora cu Gabinete Wever-Croes a cuminsa goberna, Controlaria General no tawata tin miembronan suficiente pa saca raport. Esaki tawata un forma cu e Gobierno anterior tawata uza pa pueblo no haya sa e berdad. Y asina, door di no nombra miembronan nobo, e raport Bo Aruba, cu e tempo ey tawata cla pa saca, a keda scondi pa pueblo. E raport Bo Aruba a muestra cuanto biyonna di florin e Gobierno Eman I y II a malgasta den proyectonan di infraestructura

Una bes cu nos a drenta Gobieno, nos a nombra miembronan nobo y e raportnan ta saliendo. Esey ta nos compromiso cu e pueblo di Aruba,” Prome Minister Evelyn Wever-Croes a enfatisa.

Pabien Raad van Advies!



ACCION RAPIDO PA PROTECCION DI NATURALES



Durante transcurso di e ultimo simannan, algun desaroyo a tuma luga relaciona cu un aanlegvergunning pa crea un beach dilanti Embassy Suites. Dia 16 di juni 2023, Natura Development N.V. a haya un aanlegvergunning pa crea un beach, bou di varios condicion. Un di e condicionnan ta cu no por kita of haci daño na naturalesa sin ontheffing di Minister di Naturalesa. Esaki tambe ta un prohibicion regla den nos Natuurbeschermingsverordening.

“Lastimamente, a cuminsa kita un tipo di mata protegi na e sitio en cuestion. Esaki sin un ontheffing di mi ministerio manera exige pa ley y poni como condicion den e aanlegvergunning”, Minister Arends ta declara. Natura Development N.V. ta di opinion cu nan no mester di un ontheffing y cuminsa cu e trabaonan. Motibo pa cual Gobierno mester a actua lihe pa preveni mas daño na naturalesa. Pa para e actividadnan, a opta pa un ordemaatregel. A resulta cu fundacion ABC tawata preparando un paso similar. Den comunicacion rapido cu e abogado di ABC, un peticion pa un ordemaatregel a sali cu a logra su meta di proteha naturalesa e.o. mustrando cu Minister di Naturalesa no a duna un ontheffing.

Den esaki obhetivo di Minister di Naturalesa ta pa atende e desaroyador cu e mester para e actividadnan y sigui e proceso indica. E peticion pa e ordemaatregel ta contene un ekibocacion cu a crea e impresion cu un minister ta demanda un ministerio di un otro minister.

E ekibocacion aki no tin mas consecuencia pa e proceso. Mas importante ta cumplimiento cu ley y condicion, y proteccion di Aruba su naturalesa. Esaki hustamente tawata ta e meta di e Minister di Naturalesa, cu a actua rapidamente pa preveni mas daño na naturalesa. Gobierno lo actua pa preveni cu e trabounan pa crea un beach lo continua, en espera di e siguiente pasonan legal.


Minister Arends ta reitira cu pa logra un desaroyo economico sostenibel ta rekeri un balans entre construccion y naturalesa. Den nos estado di derecho ley y condicion t’ey pa cumpli cun’e y ta conta pa tur. Esaki ta inclui proteccion di naturalesa. Gobierno ta evaluando su siguiente pasonan, teniendo na cuenta e interes general di pais Aruba y e derecho di tur esnan involvi.



Minister Xiomara Maduro ta invita pa sintonisa e programa informativo: **PAPIAMENTO: HERENCIA CULTURAL DI SCLAVITUD**

Prome parti

Presenta pa e linguista y traductor sr. Ramon Todd Dandare



Minister di Cultura Xiomara Maduro ta informa cu na vispera di e conmemoracion di 160 aña di abolicion di sclavitud den Reino Hulandes, Ministerio di Cultura ta presenta un otro programa informativo 'Papiamento: herencia cultural di sclavitud' den cuadro di un serie di programa pa informa comunidad riba historia di sclavitud di nos Pais.

E programa 'Papiamento: herencia cultural di sclavitud' ta consisti di dos parti. Den e prome parti e linguista y traductor, sr. Ramon Todd Dandare lo comparti informacion tocante con catibonan a yega na nos Pais Aruba, lo conta tocante e origen di idioma Papiamento, efectonan y resultado di colonialismo na Aruba y hopi otro informacion importante mas.

E prome parti di e programa 'Papiamento: herencia cultural di sclavitud', lo pasa dialuna awor dia 26 di juni pa 7'or di anochi na Telearuba y diamars dia 27 di juni pa 8'or di anochi na Diario tv. Minister Maduro ta extende un invitacion pa sintonisa e programa aki cu tin informacion importante tocante di nos idioma papiamento y sclavitud na Aruba.



PABIEN IMSAN CU UN LOGRO GRANDI PA CUIDO MEDICO CU E PRELIMINAR JCI ACCREDITATION



Diabierna merdia Minister di Turismo y Salud Publico sr. Dangui Oduber tabata na ImSan. Aki e mandatario a presencia e bunita momento caminda cu dr. Rajnherc a duna e bon noticia na full e team di ImSan cu nan a logra haya nan preliminary Gold Seal of Approval accreditation di Joint Commission International (JCI).

Durante tur e añanan cu a transcuri ImSan a traha hopi duro pa logra e acreditacion di JCI. Un reto cu a cuminsa bou di Gabinete Wever-Croes1 caminda hopi inversionnan a tuma lugar asina Minister Oduber a trece dilanti. Minister Oduber desde principio a sostene ImSan y a percura pa aproba e financiamiento di nan masterplan.



E acreditacion di JCI aki lo habri posibilidadnan nobo pa ImSan por sigui crece y mehora e calidad di cuidu na Aruba y explora turismo medico. ImSan lo ta e prome hospital acredita den ful e region di Caribe Hulandes. Na mundo tin un total di 1000 instituto den 70 pais cu tin e acreditacion aki. Dentro di 10 dia despues di 23 juni Aruba tambe lo ta formando parti di e grupo aki.

Aruba sigur ta orguyoso di e logro aki, Minister Oduber ta manda felicitacion na e management, e staff y ful e personal pa e excelente trabou di cuidu y servicio cu a haci e acreditacion aki posibel.

Minister Dangui Oduber lo sigui duna tur cooperacion na ImSan y tambe Hospital HOH pa asina percura pa mehoracion di cuidu, calidad y servicio.

Minister Dangui Oduber:

SIMAN PASA TABATA UN SIMAN EXITOSO PA MINISTERIO DI TURISMO Y SALUD PUBLICO

Manera ta custumber Minister di Turismo y Salud Publico sr. Dangui Oduber ta recapitula riba e cosnan mas importante cu e sosode den e siman anterior den su Ministerio. Sigur un siman hopi productivo y exitoso.



Dialuna siman pasa a habri cu un anuncio di e acuerdo entre TPEF, DOW y Serlimar. Un proyecto caminda TPEF ta bay haci e compras di 100 bari cu lo bay wordo aloca na nos costa for di Arashi Beach te cu Baby Beach. DOW ta keda encarga pa supervisa e trabounan cu e 10 ploegnan di TPEF ta haci. Tambe nan lo coordina cu Serlimar unda e barinan ta bay keda aloca na nos costa. Serlimar ta keda encarga pa zorg pa e barinan di sushi.



Durante e siman Minister Oduber tabata tin reunionnan cu diferente stakeholders den cuido medico. Den e reunionnan aki e mandatario a comparti su visionnan cu e tin pa cu e añanan vinidero.

Parti di e vision di Ministerio di Salud Publico ta cu lo kier digitalisa henter e cuido medico na Aruba. Esaki ta nifica cu den futuro tur cita lo mester wordo haci haciendo uzo di un aplicacion. Den e vision kier expande e uzo di e Aruba Health

App caminda riba e plataforma aki por ricibi resultadonan di test, haci cita medico, haya “verwijsbrief” y busca remedinan na botica tur esaki via e App.



Minister Oduber a trece e vision aki na e stakeholders den cuido medico pa asina haya nan pensamiento y tambe comparti tur e informacion di e vision aki. Segun Minister Oduber ta hopi importante pa nan wordo poni na altura di e siguiente fase di e proyecto y involucranan den e proceso.

Diaranson tabata tin un bon encuentro cu Aruba Vacation Rentals Association. Gobierno ta den e proceso pa introduci un sistema di permiso pa tur doño di vacation rentals, algo cu nunca antes a sosode segun e mandatario.



Pa e motibo aki e reunion aki ta importante como cu e ta duna e oportunidad na VRPA pa por a duna nan input. E idea ta pa yega na un maneho cu ta practico pa un y tur. Pa crea y mantene e igualdad den e condicionnan pa por opera como negoshi aki na Aruba y crea e level playing field cu tin mester. Tambe pa gobierno haya su fair share.

E tabata un siman hopi exitoso, semper ta importante pa por comparti cu pueblo tur e desaroyonan cu tin den Ministerio di Turismo y Salud Publico, e mandatario a termina bisando.



REUNION Y DIALOGO CU CAMARA DI COMERCIO



Minister di Asuntonan Economico, Geoffrey Wever, a topa cu Camara di Comercio di Aruba pa discuti topiconan economico importante. E reunion a cubri topiconan manera e.o. Vacation Home Rentals (VRH), e cobramento di BBO na frontera, y e resultadonan di e Mision Comercial recientemente pa Colombia.

Un di e punto primordial di e reunion tabata relaciona cu e follow-up di e Mision Comercial pa Colombia. Minister Wever ta sigui e dialogo cu Camara di Comercio tocante e resultadonan di e mision, enfocando riba areanan potencial pa desaroyo.

E mision comercial tabata enfoca riba fortifica conexionnan y explora oportunidadnan comercial entre Aruba y Colombia. E meta di Minister Wever ta pa capitalisa riba e mision comercial cual ta considera uno exitoso.

E discucion tambe a trata Vacation Home Rentals (VHR), un sector importante den industria di Aruba. Minister Wever a pidi Camara di Comercio su punto di bista tocante desafionan y oportunidadnan di crecemento sostenibel y regulacion den e area aki.

Durante e reunion Camara di Comercio a dialoga tambe cu Minister Wever riba e cammbionan cu Camera di Comercio y gremionan ta desea di wak na e ley di BBO na frontera. Ta importante pa mantene dialogo cu comercio, y tene nan punto di bista den consideracion, pa asina tambe considera e efectonan indirecto indesea.

Minister Wever a expresa su gratitud na Camara di Comercio pa nan aporte continuo y a enfatisa e compromiso di gobierno di Aruba pa esfuersonan colaborativo cu sector priva.

Minister Geoffrey Wever:

AGRICULTURA SOSTENIBEL PA MAS SEGURIDAD ALIMENTICIO PARTI DI E MODELO ECONOMICO NOBO



Aruba ta promove agricultura sostenibel cu un Memorandum di Entendimiento (MoU) pa sistema di green house cu ta energeticamente eficiente y cu uzo modera di awa. Esaki recientemente a ser acorda door di ministerio di Asuntonan Economico, Comunicacion y Desaroyo Sostenibel (EZCDO), conhuntamente cu ministerio di Transporte, Integridad, Naturalesa, y Asuntonan di Adulto Mayor (TINO), hunto cu Omega Engineering Curaçao.

Aruba ta tumando paso pa un modelo economico mas sostenibel y inclusivo. Cu firma di e MoU aki entre land Aruba y Omega Engineering, tin como meta pa duna sosten na empresarionan local cu desaroyo di sistemanan di green house altamente eficiente den uzo di coriente y awa pa cultivo di fruta y berdura na un escala comercial cu antes no lo tabata posibel na Aruba.

Omega Engineering ta suministra e sistema di green house, solucion di friamento y tecnologianan correspondiente. Cu

e cooperacion mester por stimula innovacion sostenibel, diversificacion economico y inclusion di (mas) participante den e industria, mientras ta fortifica e sector di agricultura na Aruba.

E acuerdo ta stipula cu e ministerionan lo trata na minimalisa mas tanto posibel e obstaculonan pa empresarionan local cu ta desea implementa sistema di green house manera esunnan cu Omega ta provee, pa asegura implementacion rapido. Sinembargo, ministerionan tambe lo apoya tecnologianan similar di otro empresanan ("third party") cu similarmente por/ta contribui na Aruba su ambicionnan di agricultura sostenibel, pues na ningun momento no ta otorga exclusividad na Omega Engineering.

Minister Geoffrey Wever ta nota cu e firma di e MoU aki ta forma parti di plan accion nacional di Aruba pa cambia su modelo economico pa uno mas sostenibel y inclusivo, mientras promove mas seguridad alimenticio riba nos isla.



MINISTER ENDY CROES A REUNI CU CENTRO MEDICO DEPORTIVO ARUBA (CEMEDAR)



Recientemente, Minister Endy Croes a reuni cu dr. Ricardo Elio Vargas – Oduardo y dr. Edmundo Josiah di CEMEDAR. CEMEDAR ta specialisa den medicina deportivo, ta prepara pa e atletanan pa nan ta den bon condicion, ta brinda evaluacion y terapia. Minister Endy Croes a indica cu ta importante pa tin e sosten di CEMEDAR pa nos atletanan, pa nan ta den e miho condicion momento cu nan ta sali cu seleccion di Aruba. Durante e reunion CEMEDAR a trece diferente data dilanti cuanto atleta nan ta trata durante henter aña den tur e disciplinanan y atletanan cu ta wordo prepara pa nan federacion cu ta competi riba plataforma internacional.

CEMEDAR a expresa e necesidad, door cu nan ta creciendo hopi y nan ta sinti cu e crecimiento aki a laga nan man hopi yen, un proposicion pa trece un doctor mas y un nutricionista riba un nivel hopi halto. Entrenamento, preparacion fisico ta bay man den man cu un bon nutricion y siña nos atletanan con pa come ora di prepara. Minister di Deporte ta bay explora e posibilidadnan pa reforsa CEMEDAR den futuro y asina



garantisa un bon preparacion pa nos atletanan cu ta representa Aruba den exterior. Concluyendo, Minister Endy Croes a indica cu e tabata un bon reunion y lo keda den contacto estrecho cu CEMEDAR. Den luna di augustus proximo lo bin cu contestanan concreto con Ministerio di Deporte por yuda den nan peticion.

MINISTER ENDY CROES A RICIBI BISHITA DI SR. EGMOND MOLINA CU TA PREPARANDO PA UN OTRO GUINNESS WORLD RECORD

Siman pasa, Minister Endy Croes a reuni cu Sr. Egmond Molina. Sr. Molina ta un personahe hopi conoci den deporte di entre otro, combate, cross fit y gym. Den e ultimo añanan Sr. Egmond Molina a kibra varios record mundial pa asina pone su nomber y Aruba su nomber den Guinness World Records Book. Recientemente, Sr. Molina a logra su di tres record mundial e biaha aki door di trek e bus cu su djente pa e distancia mas largo cu tabata existi y e peso di 11 ton. Sr. Molina su proximo hazaña ta trek e bus cu un dede.

Durante e reunion Sr. Egmond Molina a comparti cu Minister Endy Croes e ultimo desaroyonan di su preparacion y plan. Minister Endy Croes a indica cu e plannan aki no ta bay sin un costo y pa wordo reconoci den e Guinness World Records Book ta un fase. Minister Endy Croes a priminti di duna un sosten pa asina Sr. Egmond Molina por



logra su hazañanan y pone Aruba su nomber un bes mas riba mapa mundial. Mas cu claro nos lo percura pa brinda pueblo e informacionnan necesario momento cu esakinan tuma luga. Pa finalisa Minister Endy Croes a indica cu e tabata bon reunion y nos ta sostene ideanan pro activo asina pa pais Aruba.

MINISTER ENDY CROES A SALI PA CANADA Y FLORIDA RIBA BIAHE DI TRABOU PA FIRMA 5 MOU CU DIFERENTE COLLEGE Y UNIVERSIDAD

Diadomingo atardi, Minister di Enseñansa y Deporte Endy Croes hunto cu Sra. Viola Heutger di Universidad di Aruba a sali pa un biahe di trabou na Toronto, Canada. E meta di e biahe aki ta pa firma MoU cu dos (2) college y un (1) universidad na Canada, cual ta Centennial College, Sheridan College y Ontario Tech University. Diaranson binidero, Minister Endy Croes lo reuni cu council general di Hulanda cu ta situa na Toronto, Sr. Harman Idema pa dialoga riba diferente topico. Despues Minister Endy Croes ta biaha na Tampa, Florida na Merca, unda lo firma dos MoU mas cu University of South Florida y Florida Institute of Technology.

Durante siman e mandatario di Enseñansa lo duna mas informacion di e biahe di trabou aki y di e acuerdo cu a haci cu e scolnan menciona. Minister Endy Croes ta gradici Minister Plenipotenciario na Washington, Sra. Joselin Croes pa haci un tremendo trabou y habri porta pa firma e acuerdonan aki. Minister Endy Croes ta expresa di ta hopi contento pa mira resultado di e acuerdo aki entre Aruba y cinco (5) diferente scol grandi di Canada y Florida, cu lo brinda nos studiantenan di Aruba oportunidad di bay studia na un di e scolnan aki cu un miho tarifa.



Minister Endy Croes:

CONSEHO DI MINISTER A RICIBI PRESENTACION DI XAVIER UNIVERSITY SCHOOL OF MEDICINE



Siman pasa, Consejo di Minister a ricibi bishita di directiva di Xavier University School of Medicine. Directiva di Xavier University a elabora riba e inversionnan haci te cu awor y e plannan pa inversion den futuro.



Tambe, a presente e proyecto na unda cu studiantenan local por asisti na e universidad y por bin na remarca pa beca. Minister Endy Croes a enfatisa cu e ta un poyecto hopi interesante y bunita unda cu ta brinda nos studiantenan di Aruba oportunidad pa continua cu nan estudio na Aruba.

MINISTER ENDY CROES A ATENDE PRESENTACION DI LEERORKEST DI E ALUMNONAN DI COLEGIO LAURA WERNET PASKEL

Diabierna mainta, Minister di Enseñansa y Deporte Endy Croes a atende presentacion di leerorkest 2022-2023 di scol basico Colegio Laura Wernet Paskel na Santa Cruz. Un bunita presentacion di e muchanan di aña 2 te cu 6.

A traves di les online di e proyecto di Leerorkest Aruba, e muchanan di aña 2 a haya les di formacion general di musica, unda nan a siña e.o. diferente cantica. Pa loke ta trata e alumnonan di aña 3 te cu 6 a haya les di instrumento.

Pues, diabierna, dia 23 di juni, den presencia di docente y mayornan e muchanan a duna un bunita presentacion pa culmina Leerorkest Aruba di aña escolar 2022-2023. Minister Endy Croes a felicita e alumnonan di Colegio Laura Wernet Paskel pa nan bunita presentacion y cabesante di scol Juffrouw Bernadetta "Eta" Geerman-Figaroa y henter e ekipo di Colegio Laura Wernet Paskel cu a contribui den e gran evento musical aki. Alabes, Minister Endy Croes ta aplaudi e ekipo di Leerorkest Aruba cu a haci e proyecto aki posibel.



MINISTER ENDY CROES A FIRMA MOU CU CENTENNIAL COLLEGE NA CANADA

E descuento cu e studiantenan lo ricibi riba nan "tuition fee" a subi awo pa \$3000



Dialuna mainta, Minister Endy Croes hunto cu rector di Universidad di Aruba Sra. Viola Heutger y Minister Plenipotenciario na Washington Sra. Joselin Croes a bishita Centennial College na Toronto, Canada. Durante e biahe di trabou aki, a firma un tremendo Memorandum of Understanding (MoU) cu ta beneficia nos studiantenan di Aruba.

Minister Endy Croes a expresa di ta hopi agradecido di por a firma e MoU cu Centennial College. E MoU ta brinda oportunidad na studiantenan di Aruba pa por cuminsa un carera nobo. Banda di esaki, e studiantenan lo ricibi e descuento riba nan "tuition fee" el a subi di \$2000 pa \$3000. Esaki sigur ta un cifra significante. E mandatario a agrega di ta sinti e alegria di banda di Centennial College, e mes un alegria cu nos ta sinti pa crea plataforma y oportunidadnan nobo pa nos studiantenan pa continua nan estudio na Canada y ora nan finalisa nan por bin Aruba y contribui den e desaroyo di nos pais.

Pa finalisa, Minister Endy Croes a indica di ta contento di por brinda nos studiantenan e oportunidad di haya un otro sistema di enseñansa den comparacion cu enseñansa di Hulanda. Minister Endy Croes a gradici Minister Plenipotenciario na Washington, Sra. Joselin Croes pa e gran labor pa haci esaki



posibel. Tambe, Minister Endy Croes ta gradici Sra. Charmaine Hack, vice presidente Strategic Enrolment Management. Hunto nos ta logra. Pabien Aruba.



Union ta e forsa di un ekipo, famia y
nacion pa logra cada meta pa e
bienestar humano. Ban sigui den
positivismo pa engrandece nos pais.